

5e
factum 1794 93
933
DEFENSES

DE MESSIRE

PHILIPPES

DE LA

MOTHE-HOVDANCOVRT

DVC DE CARDONNE

E T

MARESCHAL DE FRANCE.

AV LIBELLE IETTE' DANS PARIS PAR
le Cheualier de la Vallette, & affiché à Saint Ger-
main en Laye, par l'ordre du Cardinal
Mazarin.



A PARIS,

Chez FRANÇOIS NOEL, rue Saint Jacques,
aux Colonnes d'Hercules.

M. DC. XLIX.

Avec Permission.

DEFFENSES

DE MESSIRE

PHILIPPE

DE LA

MOTHE-HOVEDANCOUVE

DVC DE CARDONNE

E

MARECHAL DE FRANCE

AVANCEE

DE LA



DEFENSES DE MESSIRE
 Philippes de la Mothe-Houdan-
 court, Duc de Cardone, & Mares-
 chal de France, au Libelle ietté dans
 Paris par le Cheualier de la Valette,
 & affiché à saint Germain en Laye
 par l'ordre du Cardinal Mazarin.



LE Conseil de Monsieur le Mareschal de la Mothe auoit tousiours iusques icy differé de publier ses iustifications, sur l'esperance que Monsieur le Cardinal Mazarin, Autheur de tant d'iniustices se changeroit : & aussi sur la crainte qu'ayant vsurpé tout le pouuoir dans le gouvernement du Royaume, il ne continuast à trauerfer la liberté dudit seigneur Mareschal, lors qu'il eust veu tant de veritez descouuertes. Pour semblable raison le mesme Conseil n'a voulu au secôd Factum rien toucher des campagnes faites en Catalogne és années 1643. & 1644. d'autant que ledit Cardinal est la cause originale des malheurs qui y sont arriuez : & dans les autres Factums, comme si ledit Conseil eust voulu flatter ledit Cardinal, il s'est contenté de dire, qu'il auoit esté surpris par les Ennemis dudit seigneur Mareschal.

Mais aujourd'huy qu'il continuë en sa mauuaise volonté, & qu'on a veu depuis peu afficher à Paris & à S. Germain vn placard calomnieux; dans lequel la flatterie, qui n'abandonne iamais les puissances qui regnent dans la Cour des Rois, a eu l'audace de vouloir faire croire, que sans la douceur dont a

ysé ledit Cardinal enuers Monsieur le Marechal de la Mothe, il ne seroit pas maintenant en estat de seruir la France dans Paris. Le Conseil a trouué cette vanité trop iniurieuse, pour differer dauantage la publication de ce cinquiesme Fa-ctum, afin de faire connoistre la fausseté de ce Libelle; & que bien au contraire de cette pretenduë douceur, le Cardinal a ysé enuers luy de toutes les rigueurs possibles; & que mesme par ses artifices il a enuelopé dans la ruine de ce Gentilhomme, celle de l'Estat: ayant fait manquer les plus belles occasions qu'eut iamais la France sur l'Espagne, lesquelles nous eussent indubitablement donné cette Paix Generale tant desirée de tous les bons peuples. Ceux qui aux siecles aduenir liront l'Histoire de nostre temps, pleureront la perte de ce moment, qu'on est obligé de représenter.

Le feu Roy de tres-glorieuse memoire, ayant experimenté par tant de guerres qu'il a soustenuës, que la conqueste de quelques Villes du costé de Flandres, ny les heureux suc-cès arriuez en Allemagne & en Italie, ne pouuoient reduire le Roy Catholique, à vouloir la paix, se resolut enfin de l'attaquer fortement du costé des Espagnes. A cét effet ce grand Prince, quoy que valetudinaire y marcha en personne, & la presence aux sieges de Colioure & de Perpignan, acheua la conqueste du Roussillon.

En la Campagne suiuiante, sa Maiesté continuant dans la resolution de forcer l'Espagnol à vouloir la paix, fit peu de temps auant sa mort passer en Catalogne par les soins de Monsieur de Noyers, la plus puissante armée Françoisé qui ait esté veuë de nostre temps au delà des Pirenées. L'Espagne n'estoit alors en estat de resister à tant de forces; Elle n'en auoit aucunes sur pied, elle estoit encore toute estonnée & ab-batuë des prises de Perpignan, Colioure & Mouçon, & de trois batailles perduës en Catalogne l'an 1642. dont la der-niere luy auoit causé la dissipation d'une armée de trente mil-le hommes, que l'Espagne auoit leuée pour yn dernier effort, qui fut ruinée comme en presence de sa Maiesté Catholique, & dont les restes furent depuis deffaits à la iournée de Mirauet qui cōmença la Campagne de 1643. Et ce qui reduisoit le

Roy

Roy Catholique dans l'impuissance de pouuoir dresser nouvelles armées; estoit que tous les meilleurs Officiers restoient prisonniers en France, & n'auoit pas encore eu le temps d'en faire venir d'autres des pays Estrangers,

Dans cette fauorable conioncture, le Roy commit l'exécution de ce grand dessein, qui nous eust donné la Paix, à Monsieur le Marechal de la Mothe. Il estoit alors Viceroy de Catalogne, ou depuis trois ans, nonobstant les desordres de la guerre, il auoit gouverné les peuples cōme s'ils eussent esté en paix: & ce avec tant de iustice & de douceur, que leurs voisins d'Arragon, & de Vallence, voyant la felicité de la domination Françoisse, auoient pris resolution de changer de Maistre: iusques-là que les habitans de Sarragosse, voyant leur Roy s'en retourner à Madrid, luy protestent ouuertement, que si en son absence le Marechal de la Mothe passoit la riuere de Cinca, ils ne pouuoient faire autrement que de luy porter les clefs de leur ville. Ledit sieur Marechal par vn cours continuel de victoires qu'il auoit obtenues, estoit alors en si haute reputation par toutes les Espagnes que sō seul nom y portoit la terreur, en sorte qu'on a souuēt entēdu dire à sa Maiesté Catholique, qu'elle estoit en peine de trouuer quelque Môtagne pour opposer à cette Motte.

Ce que ce puissant Monarque n'auoit peu rencontrer dans la vaste estendue de ses Estats, il le trouua au Cardinal Mazarin son Subiet, qui s'estoit fourré dans la direction absolue des affaires de France: lequel abusant de l'autorité que luy auoit commise la meilleure Princesse du monde; estima par ie ne sçay quelle politique inconneue à d'autres qu'à luy, qu'il falloit ruiner ce grand effort preparé du costé de l'Espagne: soit à cause que ses inclinations ont tousiours eu la pente du costé de sa naissance, & de son education: soit aussi qu'il apprehendoit que les bons succes du costé de l'Espagne aduançassent la paix, pendant laquelle il iugeoit quelque diminution de son credit: il se peut aussi qu'il l'ait fait, afin d'empescher que Monsieur le Marechal de la Mothe ne vint à ce haut point de gloire, d'auoir par ces heureux succez obligé le

Roy Catholique à la paix : apres laquelle il eust peu mesnager le retour de monsieur de Noyers son parent & amy, dans les affaires, retour que le Cardinal a tousiours principalement apprehendé.

Quelque raison que puisse alleguer le Cardinal, il est constant que cette puissante armée, que le feu Roy auoit fait passer en Espagne, est perie sans pouuoir rien faire : & que ce malheur est arriué par sa faute, ou par sa malice : car encores qu'il ait vsé de mille artifices pour s'en discoulper, sa conduite y a assez paru pour n'en douter pas. Il n'osa pas d'abord faire repasser l'armée en France, d'autant qu'un chacun eust crié contre son nouveau ministere : & comme il est le plus artificieux de tous les hommes à cacher ses defauts, il trouua vn moyen moins esclatant qu'il fit manier par tant de mains, qu'il creut qu'aucun ne l'en oseroit vray-semblablement soupçonner. Il sçauoit que pour passer aux Royaumes d'Arragon & de Valence, il y a quelques pays steriles, où il y faut porter des viures, qu'on ne peut auoir sans argent ; Il sçauoit bien qu'en Catalogne, comme en Hollande, les Soldats ne peuuent sortir de leurs quartiers pour marcher en campagne, sans auoir prealablement payé leurs hostes : & ainsi que le nerf de la guerre manquant, quelque puissante que fust l'armée elle demeureroit inutile.

Afin qu'elle se peust ruiner d'elle-mesme, comme insensiblement, apres que le Cardinal eut fait diuertir les fonds que M. de Noyers auoit destinez par l'ordre du feu Roy, il fit semblât de tesmoigner en public de la chaleur à vouloir que l'armée de Catalogne ne manquast de rien ; à cet effect il fit bailler pour toutes les sommes qui luy estoient necessaires, des assignations & des lettres d'eschange par Montauron. Mais, ô fourberie sans exemple ! il se trouua que les assignations auoient desia esté données à d'autres, & que toutes les lettres d'eschange furent protestées : Ce qui empescha l'armée de se pouuoir mettre en estat d'agir ; seulement Monsieur le Marechal de la Mothe, apres auoir emprunté quelques deniers des habitans de Barcelone, fist sortir des quartiers quatre à

cing mil hommes, avec lesquels il entra foiblement dans le Comté de Ribagorze, d'où il fut contraint de se retirer, faute de pain.

M. le Cardinal quelque artificieux qu'il puisse estre, ne se peut excuser de ce grand manquement. S'y agissant de l'entretien d'une armée importante, il n'y a Sur-Intendant ny Secretaire d'Estat qui oüst l'avoir entrepris sans ses ordres. Ces Messieurs donnent quelquesfois semblables rescriptions & assignations à quelque pensionnaire importun, pour se redimer de ses importunitéz : Mais on ne doit point payer en pareille monnoye les armées, dans la subsistance desquelles consiste la grandeur des Estats, & le repos des peuples. Pour moindre suiet François I. fit pendre le sieur de Semblancé, qui avoit par l'ordre de Madame Louise de Sauoye mere du Roy, diversifié le fonds destiné à l'armée que commandoit en Italie Monsieur de Lautrec. Et ce qui fait presumer que le Cardinal a esté autheur de la fourbe, est que les Ordonnateurs & Montauron n'en ont point esté recherchez, & sont demeurez impunis.

On peut facilement croire, qu'un General, homme de cœur, ne peut les bras croisez, voir perir entre ses mains une puissante armée par la faute d'autrui, sans se plaindre. En cet accident la douleur ne peut estre que tres-sensible. Monsieur le Marechal de la Mothe (qui ne se promettoit pas moins pendant cette campagne que la conquête de deux Royaumes) en parla hautement. Il se plaignit à la Cour de cet abandonnement, & demanda que pour le bien des affaires du Roy, on donnast à la Catalogne un autre Secretaire d'Estat que Monsieur le Tellier, qui est creature du Cardinal, lequel prenant cette plainte pour affront, eut l'astuce de vouloir persuader à la Reyne Regente que le Marechal faisoit telles plaintes non contr'eux, mais pour faire blasmer le gouvernement de sa Maiesté; & voilà le crime secret par lequel ils ont surpris la bonté de la Reyne, & du depuis tant persecuté ledit Seigneur Marechal.

Il fallut enfin par honneur, que le Cardinal enuoyast

quelque argent en Catalogne ; il le fit sur la fin du mois d'Aoust ; mais avec cette precaution , qu'en mesme temps qu'il fortifioit l'armée par ce secours trop tard arriué, il la diminuoit par ailleurs. Car comme s'il eust eu apprehension que monsieur le Marechal de la Mothe ayant de l'argent n'entreprist encore quelque chose de grand sur la fin de la Campagne ; il luy fit donner les ordres par courrier expres, de renvoyer en France les Regimens d'Anguyen & de Conty : & de plus , casser & licentier plusieurs autres Regimens de Cavallerie , & d'Infanterie , ce qui affoiblit entierement l'armée Françoisse : Il arriua encore qu'en mesme temps M. le Cardinal fit eschanger avec nos prisonniers faits en la bataille d'Honnecour, ce grád nombre d'Officiers Castillans que M. le Marechal de la Mothe auoit pris és iournées de Villefranche & de Miráuet , tellement que l'Ennemy fortifié des hommes qui luy manquoient , leua sur la fin de la Campagne, vne nouvelle armée avec laquelle il assiegea & reprit Mouçon.

Cependant le Roy Catholique prenant l'occasion de tant de manquemens , tramoit des pratiques & menées pour faire reuolter la Catalogne : il fit ietter des billets dás Barcelone & autres villes du principat, par lesquels au nom de Sainte Eulalie & des autres Saints Patrés du Pays ; Il exhortoit les Catalans de retourner dans son obeyssance , leur promettant Amnistie de tout le passé : & leur disant qu'ils pouuoient bien voir que sa Maiesté estoit d'accord avec la Cour de France, & eux abandonnez d'icelle ; par le peu de secours qu'on auoit enuoyé depuis la mort du Roy au Marechal de la Mothe. C'est au Cardinal à se lauer de cette intelligence , estant assez visible qu'en ces occurrences , & en beaucoup d'autres , il a vtilement seruy l'Espagne.

Et ce qui doit fortifier le doute qu'il en a eu le dessein, est la loüange affectée que donne au Cardinal ce pretêdu Libelle ou Placard, en l'exaltant côme vn hôme si esloigné de son interest, qu'on ne le void point acquerir de terres , charges, maisons , ny gouuernemēs, côme ont fait les autres Ministres & Fauoris qui l'ont precedé. Mais bien loin de l'intention de
tels

relles flatteries, on peut dire avec verité, que toute cette fa-
 con d'agir est vn tesmoignage certain qu'il n'ayme pas la
 France, puis qu'il ne s'y attache pas: Au contraire, il vent ce
 qu'il y a, faisant argent de tout. On luy a veu la charge de
 Sur-Intendant des Balthimens, & il la vendue. Il a vendu le
 Controlle General des Finances, & la Capitainerie & Gou-
 uernement de Fontainebleau: il cherche maintenant
 quelque autre, qui luy achapte la Conciergerie du mes-
 me lieu. Et encore qu'il soit d'une humeur extrême-
 ment auare, il a ses Benefices comme indifferents; Il en a
 voulu donner des plus importans à Monseigneur le Cardinal
 de Lyon qui les a genereusement refusez: on scait à qui il auoit
 baillé l'Abbaye de Corbie, & depuis peu l'Abbaye de Mois-
 sac pour adiufter le procez de celle du Toronet. On le void
 tous les iours par de fausses generositez, constituer & consen-
 tir des pensions sur ses benefices pour des personnes indiffe-
 rentes. Toutes actions extraordinaires qui montrent qu'il a
 d'autres pensées que de s'habituer en France: la maison mes-
 me qu'il bastist & habite n'est pas à luy, il n'y a aucuns meu-
 bles ny prouisions, que les marchands ou pouruoyeurs ne se
 vendiquent. Il faudroit estre sans iugement de voir vn Estran-
 ger amasser dans ce Royaume des millions qu'il enuoye en
 pays neutres, & ne pas croire qu'il n'ait intention d'en sor-
 tir, & de se mettre en estat de choisir tel party des deux Cou-
 ronnes qu'il luy plaira.

La Politique de Monsieur le Cardinal se contenta en la
 Campagne de 1643. de rendre M. le Marechal de la Mothe
 inutile. En la suiuiante 1644. passant plus auant elle le voulut
 faire malheureux: pour y paruenir, elle luy suscita des Enne-
 mis, luy fit denier toutes faueurs, & tascha à le decrediter en
 Catalogne, & dans l'armée qu'il commandoit. Ce peut-il
 voir menterie plus raffinée, que d'entendre le Cardinal dire
 aux Officiers qui auoient esté reformez en son armée: que
 c'estoit le Marechal qui les auoit cassez de son autorité,
 encore que c'eust esté par les ordres precis que luy-mesme
 auoit enuoyez de la Cour. De faueurs il n'en a receu aucunes

Depuis le Ministeriat du Cardinal, il ne se trouuera point dans les comptes de l'Espagne, qu'il ait touché vne seule gratification, cōme les autres Generaux d'Armée: n'ayant pas mesme esté payé de ses pensions & apointemens de Marechal de France. Au contraire on luy aregraté sur la rançon du Marquis de Pouare, de laquelle le feu Roy l'auoit gratifié en recompense d'une bataille gagnée. Et depuis Monsieur de Vau-
becour ayant fait en sa faueur vne demission du Gouverne-
ment de Parpignan, les pronisions luy en furent refusées; en-
core que le feu Roy l'eust agréé, & que les victoires eussent
beaucoup seruy à la prise & conseruation de cette place.

Monsieur le Marechal ne se veut pas plaindre de ces refus, d'autant qu'encore qu'il eust quelque iustice, ils despendoient de la grace du Prince: mais il se peut legitimement plaindre des choses refusées en intention de le decréditer, cela ayant beaucoup aydé à ruiner le seruice du Roy dans l'armée, & dans vne Prouince Estrangere qu'il gouuernoit. Selon les constitutions de Catalogne, les Viceroyz presentent au Roy pour les Benefices, & pour les Charges, trois personnes, desquelles le Roy laisse faire choix au Viceroy, & iamais les Roys de Castille, ny d'Arragon, n'ont esté contre ce priuilege. Monsieur le Cardinal depuis son Ministere en a tousiours fait elire d'autres que ceux qui estoient presentez par Monsieur de la Mothe Viceroy. Et les recommandations qu'il faisoit à Messieurs les Ministres pour les Officiers de l'Armée, qu'il iugeoit dignes de seruir, leur estoit vne exclusion assurée; tellement que les François & Catalans retournant de France, disoient hautement que pour ruiner vne affaire à la Cour il falloit prier le Viceroy de la recommander.

Le mespris le plus insupportable de tous, fut au commencement de cette derniere Campagne, que le Cardinal ayant gagné quelques Officiers Maieurs de l'Armée de Catalogne, Monsieur le Tellier par son ordre leur escriuoit Lettres de Cachet au nom du Roy, ne faisant plus scauoir aucunes nouuelles à l'Armée que par leur bouche: ce qui leur faisant presumer estre dans les secrets du cabinet, & ainsi

auoir plus de credit que leur General, chacun d'eux commen-
ça à trancher du maistre; & de là vinrent les diuisions & desobeyssances, qui causerent en Catalogne partie des mauuais
succes de cette Campagne. Monsieur le Marechal de la Mo-
the les preuoyant, il demanda instamment vn Lieutenant
General, ce qui fut formellement empesché par Monsieur
le Cardinal, qui ne tendoit qu'à luy trouuer des contredisans,
afin d'apporter la confusion à tous ses desseins.

Vne rupture de Traitté pour les recreues, a encore grande-
ment contribué à ces malheurs, Monsieur le Marechal de la
Mothe voulant remplacer les troupes qu'on luy auoit ostées
la precedente Campagne, auoit traité avec ses Officiers de
Caualerie, que moyennant quatre mille liures, chacun d'eux
tiendroit sa Compagnie complete de soixante hommes en
Catalogne dans la fin de Mars. Monsieur le Cardinal fit rom-
pre ce Traitté par Monsieur le Tellier, qui se contenta que les-
dits Officiers fissent leurs Compagnies de cinquante hom-
mes dans la fin d'Avril, moyennant mil escus qu'il leur fit or-
donner, & mal payer; De ces deux manquemens derniers
sont prouenus tous les desordres qui suivirent. En ce que les
Officiers ayant eu terme iusques à la fin d'Avril pour leur re-
creuës, peu d'entre eux estoient encore arriuez le 15. de May,
que fut le combat de Leyde. Absence qui causa la perte de la
Bataille, ioint la desobeyssance & lascheté de la plus grande
part de ceux qui y estoient; lesquels se retirerent sans comba-
tre, abandonnant leur General & toute l'Infanterie à la mer-
cy des Ennemis: & au lieu d'en faire punition exemplaire,
Monsieur le Cardinal en a recompensé le Commandant de
la Caualerie par des gratifications secretes la premiere année,
& par des emplois signalez, les suivantes.

Monsieur le Cardinal s'est tellement rendu ingenieux, à
vouloir faire monsieur le Marechal de la Mothe cause de la
perte de cette bataille; que son Conseil se trouue obligé
d'en représenter des esclaireissemens qui se voyent aux in-
formations qui en ont esté faites en Catalogne. Dès la fin
d'Avril, D. Philippes de Silves General de l'Armée Enne-

mie pressé par la presence du Roy d'Espagne arriué en mesme temps à Saragossie, se mit en campagne : & apres auoir fait pendant quelques iours, plusieurs feintes de vouloir attaquer Flix ou Balaguier, se vint finalement camper deuant la ville de Lerida. Dés auparauant monsieur le Marechal de la Mothe auoit enuoyé le sieur de Boissat avec sa Caualerie, pour empescher les Ennemis de passer la Segre ; Balhasar s'offroit de le faire avec son Regiment, & cinq cens cheuaux qu'il demanda, ce que ledit sieur de Boissat luy refusa, respondant qu'il eust desiré les Ennemis desia tous passez au deça de la riuere, afin que la gloire de leur deffaire en peust estre plus grande.

Monsieur le Marechal ayant receu en mesme temps trois mille hommes de pied de ses recreuës nouuellement débarquées à Barcelone, marcha en diligence pour ietter du secours dans Leyde, auparauant que les Ennemis eussent peu acheuer leurs retranchemens. Ayant joint à Ceruere sa Caualerie & Infanterie, avec la garnison qu'il auoit retirée de Balaguier il alla droit à Leyde ; aux aproches il deffit huit cens hommes des postes aduancez, lesquels allerent ietter l'espouuante dans leur Camp. Il vouloit poursuiure sa pointe sur l'aduis certain qu'il receut que le pont de batteaux des Ennemis n'estoit acheué, & qu'ainsi il defferoit facilement ceux qui estoient desia passez au deça de la riuere.

Il fut opposé en son dessein, quoy qu'il fut selon les regles de la guerre, par ses principaux Officiers, qui luy declarerent ne se pouuoir presenter aux Ennemis sans canon ; selon la pluralité des aduis, il le fallut attendre : il tarda quatre heures, pendant lesquelles le pont fut acheué : en sorte qu'à son arriuée il trouua les Ennemis en bataille au deça de la Segre. Il n'y auoit plus moyen de se retirer, ny aussi d'entrer dans Leyde sans deffiler : ce qui eust esté perilleux à la veüe de l'Armée Ennemie, & qui fit resoudre Monsieur le Marechal de la Mothe à la bataille ; avec toutes les apparences d'heureux succès : Les Officiers qui le cōtredisoient en tout autre chose,

en furent mesme d'aduis ; toute l'armée estoit en allegresse , attendant avec impatience l'heure & le tēps du combat ; nous auions l'aduantage du lieu , & iamais Monsieur le Marechal n'auoit combattu les Espagnols avec des forces tant egales : Nostre eanon les foudroyoit , & les obligea à venir à nous à la desesperade ; Nostre Infanterie , & Artillerie y firent merueilles , & M. de la Mothe de son costé reuerfa l'aisle gauche qu'il reduisit à demāder quartier , & nos gens crioient victoire , lors que seize cens cheuaux opposez à l'aisle droicte conduits par Boissat Marechal de Camp se retirerent sans combattre , pas à pas , sans estre suivis des Ennemis , ce qui a fait soupçonner aux Catalans & à d'autres qu'il y auoit intelligence.

Ce fut icy la premiere disgrace qu'ait iamais eüe dans les combats , monsieur le Marechal de la Mothe ; il auoit assisté en cent autres , & auoit luy mesme gagné six Batailles qui auoient tellement confirmé cette haute reputation qu'il a acquise , que la perte de celle-cy , ne la diminua aucunement. Et de verité , il y tesmoigna qu'il auoit la force de porter la bonne & mauuaise fortune avec vne grande egalité d'esprit. Car se voyant abandonné , & la Bataille sans ressource , il ne desespera pas encore de faire l'effect pour lequel il estoit venu , c'est à dire , de secourir la ville assiegée : & comme il a tousiours eu , autant que Capitaine du monde , le iugement present parmy les dangers. Il trouua dans l'occasion , le moyen de l'executer. Il considera que les Ennemis s'arrestant au pillage de son camp , il auroit le tēps de reunir partie de son Infanterie , & la faire aller dans les iardins de Leyde : il se met à la teste d'une partie , & l'y conduisit , d'où sans aucune difficulté le Cheualier de la Valliere les mena dans la Ville ; & apres qu'il les eust veu passer le pont , il se retira luy quinzieme à Ceruere , pour mettre ordre au reste de la Prouince. Par ce secours la garnison se trouua de quatre mille hommes & Dom Philippes de Silua ne l'osa plus attaquer de force : ainsi vne place qui auroit esté emportée en huit iours fut capable

de soustenir plus de trois mois de siege, & eust tenu encore davantage sans les fautes du Gouverneur.

Les Catalans eurent en plus grande estime Monsieur le Marechal de la Mothe, qu'ils n'auoient auparauant cette action, laquelle ils comparoient aux plus belles des anciens Capitaines : y ayant peu d'exemples qu'apres vne bataille perdue, aucun ait executé avec ordre l'effet pour lequel elle auoit esté donnée. De plus qu'apres s'estre retiré, il soit avec le debris de son armée, de nouveau venu r'affronter les ennemis victorieux, & leur presenter vne secōde Bataille, avec vne contenance si resoluë qu'il n'oserent sortir de leurs retranchemens. Refus qui obligea Monsieur le Marechal de la Mothe à se camper en des lieux, d'où il pouuoit incommoder les assiegeans. Il les fatigua par des alarmes & des combats continuels, il leur prit souuent des conuois, deffit nōbre de secours qui venoient en leur Camp. Et tout cela comme en presence du Roy Catholique qui estoit à Fragues, quatre lieuës de Leyde; continuant la guerre en sorte, qu'il se trouuera peu de Villes prises qui ayent tant cousté à l'Espagne, qui pourra mettre cette victoire entre les Cadmeenes, ayant esté pendant le siege obligée de renouveler l'armée par deux fois.

Monsieur le Marechal de la Mothe eust encore secouru la place, si les ordres precis de Monsieur le Cardinal ne l'en eussent empesché en deux occasions. La premiere vn mois apres la bataille qu'il le voulut tenter apres que les Regimens de Champagne & de la Marine l'eurent ioinct, avec les milices de Catalogne; tellement que l'armée se trouuoit assez nombreuse pour tout entreprendre. L'Ennemy estoit estonné de nostre resolution, sa circonuallation n'estant du tout acheuë: nous auions encore le fort Gardin qui nous en facilitoit l'execution. Les principaux Officiers s'opposerent à cette glorieuse entreprise & pour les autoriser en leur opinion, Monsieur de Beauuais Plessian enuoyé par Monsieur le Cardinal monstra les ordres de la Cour, signez le Tellier, par lesquels il estoit expressement deffendu, de tenter le secours de la place, ius-

ques à l'arriuée des troupes qu'amenoit de France Monsieur le Marquis de Villeroy. Monsieur le Marechal de la Mothe fut contraint d'en passer par là, quoy qu'il remoustrast que ce secours seroit long à venir, & que cependant l'Ennemy acheueroit ses retranchemens, & prendroit Gardin: que le secours qu'on faisoit esperer venant de loin, seroit si foible à son arriuée, qu'il ne suppleroit pas aux troupes que l'armée qui estoit assez forte, auroit perdu en l'attendant. Preuion veritable, car lors de la iunction l'armée se trouua moindre qu'elle n'estoit lors de l'occasion perduë. Et depuis ce secours arriué, Monsieur le Marechal ayant voulu pour la seconde fois attaquer les lignes, Monsieur de Castelan enuoyé par M. le Cardinal, ne le iugea pas à propos: Et en donnant le change, dist que l'aduis de son Eminence estoit pour compenser la perte de Leyde, d'assiéger Roses ou Terragone, pourquoy on promettoit enuoyer par mer six mille hommes qu'on auoit pris du licentiement de l'armée des Princes d'Italie, apres la paix du Duc de Parme.

Monsieur le Marechal de la Mothe, iugea l'entreprise de Terragone plus à propos: d'abord il attaqua le Mole par mer & par terre, & l'emporta par le plus effroyable assaut qui ait esté donné dans toutes les guerres de ce siecle: y ayant eu de part & d'autre, plus de huit mille coups de canon tirez en deux heures. La prise de la Ville estoit indubitable apres ce grand exploit, si Monsieur le Cardinal eust enuoyé les six mille hommes qu'il auoit promis. Il les fit demeurer en Italie, sous pretexte de la mort du Pape Urbain; les y iugeant plus necessaires, pour fauoriser dans le Conclauel' eslection de Monseigneur le Card. Sachetti son amy, comme s'il eust esté permis de mesler les armes dans l'electiõ du Chef de l'Eglise: Neantmoins cette vision a cousté à la France la perte de Terragone: car lorsque Monsieur le Tellier enuoya vu courrier pour donner aduis que ce secours demeueroit en Italie, il ne restoit pas au siege deux mille hommes de pied: & les Marechaux de Camp continuant en leur bonne intelligence y agis-

soient en sorte, que ce qu'un d'eux aduançoit en vne iournée, estoit le lendemain ruiné, par la ialousie de l'autre. Cependant le Roy & le Prince d'Espagne estant arriuez à Leyde avec dix mille hommes, les Catalans apprehendant vne irruption dans le pays, prièrent Monsieur de la Mothe d'abandonner Terragone pour s'y opposer, comme il fit avec sa Cavalerie qu'il auoit laissée dans la plaine d'Vrgel.

Toute l'Europe parla diuersement de la cause de tels succès arriuez en Catalogne pendant ces deux Campagnes. Les François & les Estrangers non interressez, avec ceux qui desiroient la paix les penetrerent facilement; les Ennemis les descoururent par leurs billets & placards; & les Catalans qui en estoient les tesmoins oculaires, disoient hautement que Monsieur le Marechal de la Mothe y auoit payé de sa personne, & qu'il eust porté les armes de France bien auant, si on luy eust enuoyé à temps, les choses necessaires & promesses. En la Cour de France, les adherans & partisans de Monsieur le Cardinal fermoient la bouche à ceux qui en vouloient veritablement parler; publiant des choses inuentées & ridicules contre Mondit sieur le Marechal de la Mothe, iusques là de dire, que s'il eust voulu, il eust peu faire le Roy d'Espagne prisonnier.

Monsieur le Cardinal apprehendant des plaintes publiques contre son ministere, y proceda d'une autre façon: Et comme il pratique exactement cette politique, de s'attribuer la gloire de toutes les choses bien faites, encore qu'elles soient fortuites, & qu'il n'ait participé ny dans les conseils, ny dans l'exécution: Il reiette aussi sur les autres les causes des euenemens qui ont mal reüssi. On le voit abuser en sorte de la bonté de la Reyne Regente, qu'il luy fait boire mesme ce calice; en ce que contre l'ordinaire des bons Ministres & Seruiteurs il s'attribue l'honneur des graces & bien faits, & reiette sur sa Maiesté les refus & mescontentemens.

Or afin de s'excuser de tant de desordres arriuez en l'armée de Catalogne, il fit que la Reyne Regente escriuit en
forme

forme de Manifeste, aux deputez du Principat de Catalogne vne longue lettre, dans laquelle sa Maiesté representoit les secours d'hommes & d'argent, qui leur auoient esté enuoyés depuis sa Regence. Monsieur le Tellier, creature de son Eminence, y fit l'addition d'un petit discours où commentaire, dans lequel il mettoit le detail des choses, dont sa Majesté n'auoit parlé que generalement dans la lettre. Il est vray que partie des hommes & de l'argent, dont y est faicte mention a esté enuoyée; Mais captieusement Monsieur le Tellier n'y a pas exprimé le temps, d'autant que cela eust fait cognoistre que tels secours estoient inutiles, n'ayant esté enuoyés, qu'apres les occasions perdues.

Quelque autre qu'un Italië se seroit cōtenté, que la Reyne luy eust fait l'honneur de publier ce Manifeste pour sa iustification. Le Cardinal veut passer plus outre, il veut poursuivre iusques à la fin un homme qu'il croit auoir offensé. Et comme la nation est industrieuse à chercher les moyens de se vanger il en trouua un par lequel il se persuada pouuoir entierement ruiner Monsieur le Marechal de la Mothe: ce fut par vne subornation, qui est la plus honteuse tentative qui puisse tomber dans la pensée d'un homme qui faict profession d'honneur, voicy comment. Il y auoit à Paris un Moine appelé L'Abbé Sala eschappé des prisons de l'Inquisition de Barcelonne, où il estoit detenu à cause de crimes enormes, & postuloit à la Cour de France par le moyen de Monsieur le Tellier, que par l'autorité du Roy il peust estre restabli en Catalogne & dans la iouissance de son Abbaye. Mondit sieur le Tellier, l'ayant recogneu pour un esprit hardy, capable de tout entreprendre contre Monsieur le Marechal de la Mothe le proposa à Monsieur le Cardinal qui le iugea propre à son dessein, pour auquel paruenir & afin de le mettre en quelque opinion de probité dās l'esprit de la Reyne, il fit encore que ce gallāt, quoy que suspēdu & interdit preschast deuant sa Maiesté en Castillan dans l'Eglise des Feuillants. Il auoit auparauant gagné Puiolar lequel de Miquetlet où bandollier estoit deuenu agent de Cata-

logne. Ces deux personages se firent accomp'gner d'un Moyne Collecteur des aumosnes de Monserrat; Ils allerent tous trois ensemble à Fontaine-bleau, où ils furent presentez à la Reyne Regente par Monsieur le Tellier, comme s'ils eussent esté deputez où Ambassadeurs de Catalogne: Et en cette qualité L'Abbé fit effrontement à sa Majesté en langue Espagnole vne harangue remplie de plaintes des Catalans, & en suite presenta vn memorial escriit contre ledit Seigneur Marechal: Ces Calomniateurs iouèrent si bien leur jeu en cette occurrence, que dès le soir Monsieur le Cardinal fit resoudre d'arrester prisonnier Monsieur le Marechal de la Mothe, & on publia pour nouuelles par tout que sur les plaintes des peuples on l'ostoit de Catalogne & qu'on y enuoyoit en sa place Monsieur le Comte d'Harcourt Viceroy.

On eust difficilement descouuert cette trahison, sans que peu apres arriuerēt en cour de veritables Ambassadeurs du Principat, lesquels estonnez d'entendre tels discours contraires à leurs instructions, qui estoient remplies des contentements que tesmoignoit la Catalogne du gouuernement de Monsieur le Marechal de la Mothe, iugerent à propos d'escrire à Messieurs les Deputez, & à Messieurs du Conseil des cent de Barcelonne pour sçauoir s'ils auoient donné charge à L'Abbé Sala & à Puiolar de faire telles plaintes au nom du Principat contre ledit sieur Marechal. Ces Messieurs furent surpris & touchés de ceste nouuelle. Ils desaduouèrent par acte public ceste imposture, & manderent à leurs Ambassadeurs d'oster l'agence du pays à Puiolar: Mais le Cardinal qui ne vouloit abandonner vn homme qui l'auoit si vtilement seruy, fit dire par Monsieur le Tellier aux Ambassadeurs que la Reyne Regente vouloit que ledit Puiolar demeurast Agent: & depuis en recompense de sa calomnie, il a esté faict Chanoine de Parpignan. Au regard de L'Abbé Sala, sans autre iustification le Cardinal le fit par Monsieur le Côte d'Harcourt restablir en Catalogne, ou depuis les Viceroy

l'ont protégé par son ordre contre la iustice de ses Supérieurs Ecclesiastiques.

Il sembloit que ceste calomnie descouuerte feroit changer la resolution d'arrester Monsieur le Marechal de la Mothe; mais la passion de Monsieur le Cardinal preualut enfin à la raison. Ledit Marechal fut rappelé de Catalogne, il en sortit avec les regrets & les pleurs des peuples, & en passant à Lyon le iour des Innocens, on l'arresta prisonnier dans le Chasteau de Pierre Encise. Il auoit eu aduis tres certain qu'on l'arresteroit là, mais tenant sa conscience entierement nette, il ne fut pas en la puissance de tous ses amis & seruiteurs de l'en empescher, de sorte qu'il vint volontairement se ietter dans les rets, qu'on luy auoit tendus.

Ceste franchise avec laquelle Monsieur le Marechal se rendit prisonnier, meritoit vn plus fauorable traictement, que celuy qu'on luy a fait, tant à Lyon, qu'à Grenoble; & si les Partisans de Monsieur le Cardinal appellent cela douceur, ils veulent donner au vice le nom de la vertu qui luy est contraire. Il y a esté traicté avec des rigueurs qui ne sont pas imaginables, il suffist de dire quil a esté gardé à veüe & qu'en veillant ou dormant il y auoit tousiours trois Soldats en garde le chien de la carabine rabatu. Monsieur le Tellier par ordre de Monsieur le Cardinal deffendit de luy donner papier ny encre & qu'on admist aucun à luy parler: son valet de chambre n'auoit permission de le voir qu'au leuer & au coucher. Dans le regne passé Messieurs les Marechaux de Vitry & de Bassompierre n'ont point esté gardez de la sorte, aucuns ne couchoient dans leurs chambres que ceux qu'ils auoient choisis de leurs domestiques, ils estoient visités avec liberté de tous leurs amis, ils auoiēt encre & papier: & le dernier y a composé des liures. Encore si Monsieur de la Mothe eust esté accusé de quelque crime noir & d'Estar, telle rigueur se pourroit excuser: mais il ce voit par la Commission adressée au Parlement de Grenoble que le procez qu'on luy faisoit n'estoit pretexté, que de recherche d'ar-

gent; pour lequel cas personne n'a iamais esté ainsi obserué iusques là que Tacite s'estõne que Sejan Ministre de Tibere ne s'agissant que *de repetundis*, au faict de Silius Amy de Germanicus, fiât au procez *in questione Maiestatis*. Cela n'est point aussi l'usage de France. Si Tabouret ou Catelan estoient recherchez pour des millions entiers, dans vne Chambre ardente de Iustice; ils auroient encre & papier & l'accez de leurs amis ne leur seroit pas refusé.

Monsieur le Cardinal ayant mis en seureté la personne de Monsieur le Marechal de la Mothe; il restoit de trouuer vn crime pour colorer la prison d'un homme, qui retournoit glorieux d'un pays, qu'il auoit conserué à la France, par sa conduite & par son espée: la calomnie des trois Catalans desaduouée ne pouuoit plus seruir de pretexte, il y failloit quelque crimes nouveaux. Surquoy son Eminence s'aduisa de donner à Monsieur le Tellier la Commission d'en chercher, c'est vn subiect qui auoit toutes les qualitez qu'il faut pour le faire, il estoit ennemy déclaré de Monsieur de la Mothe, & il possedoit la charge de son parent & amy, duquel il aprehendoit le retour; de plus ayant esté long-temps Procureur du Roy au Chastelet, il y auoit appris toutes les ruses & chicanes imaginables à bien tourmenter ceux, qu'ils entreprendroient.

La modestie deuoit empescher le Cardinal de donner cette Commission à vn homme que le Marechal de la Mothe luy auoit escrit estre son ennemy, & la mesme modestie deuoit empescher l'autre de l'accepter. Neantmoins il le fit, & iouant de l'espee à deux mains d'Ordonnateur & de Secrétaire d'Estat. Il a pratiqué des choses que la posterité s'estonnera auoir esté faictes pendant la douceur du regne de la Royne Regente.

Affin de ne manquer pas, il debuta en sa commission par ordonner L'Emprisonnement de tous ceux qui auoient approché Monsieur le Marechal de la Mothe, où qui s'estoient meslez de ses affaires iusques au nombre de 25. à 26. Sçauoir Monsieur de la Vallée homme du Roy, dans
l'armée

l'armée de Catalogne, le Sieur Boifot Intendant & Secrétaire dudit Seigneur Marechal, le Sieur Bellestat son Aumosnier, le Sieur Raiault son Secrétaire, le Sieur David son Agent à Paris, & le Sieur du Mas Cavalier de son Regiment, le Sieur Dorée Intendant de l'armée, les Sieurs Talon & Moreau, commis de l'extraordinaire de la guerre, avec leurs sous-commis, Colas, des Neus & Briandais, la Chapelle domestique dudit Sieur Talon, avec son frere nommé la Coupe, vn appelé Donadou Sauvetat Orfeure marié & demeurant à Mont-blanc, & les appelés, Jaques Oliuier, Fabre, Jean Collier, Martin Fadin, L'Algouazil honeau, Soret, avec Cherard ferrurier Catalan. Et crainte qu'il n'en manquast quelqu'un; Monsieur le Tellier decreta encore contre Denia Secrétaire de Monsieur de la Mothe & contre Dormé commis du Sieur Talon qui estoient morts, il y auoit long-temps.

On a esté obligé de nōmer cette multitude, d'autant que referant simplement le grand nombre de ces prisonniers, le sage Lecteur l'eust pris pour hyperbole: ny ayant point d'exemple dans toutes nos Annales, que pour faire le procès à vn seul homme, on ait emprisonné tant de personnes. Sous le Regne de Charles VII. Le duc d'Alençon fut iugé, & il ny eut avec luy qu'un Secrétaire arresté. Sous Louys XI. l'Heraut Mont-ioye & son fils furent seuls prisonniers avec le Connestable Saint Paul: on n'en remarque aucun dans les procès des Marechaux de Gré & de Biez, & de Montmorency: & en celuy du Marechal de Biron, il n'y eut qu'un Secrétaire. Barbin avec les Secrétares Ludouici & Montaubert le furent seuls avec la Marechale d'Ancre; avec le Marechal de Marillac il ny eut que trois prisonniers qui furent incontinent relaschez. Mais au sub-jet de monsieur le Marechal de la Mothe, Monsieur le Cardinal & Monsieur le Tellier, ont voulu establir cette nouvelle Iurisprudence: que pour paruenir à leurs fins ils pouuoient indifferemment emprisonner l'Innocent, comme le coupable.

Avec l'Emprisonnement des personnes, les papiers furent pris, & tous les biens saisis, scellez & annotés, & dès l'instant le tout inventorié; en Catalogne par Monsieur de Marca, & à Paris par Monsieur le Gras, & par Monsieur le Lieutenant criminel. De plus Monsieur le Tellier au nom du Roy, despescha avec grande actiuité & despenſe des courriers dans toutes les banques de la Chrestienté, pour ſçauoir combien d'argent monsieur le mareschal de la mothey auoit. Eſcriuit à Monsieur de Marca d'informer en Catalogne contre ledit Seigneur mareschal: & de faire ſaiſir & mettre entre les mains du Roy la Duché de Cardone, duquel ledit Sieur iouiſſoit paisiblement en ayant eſté inueſty par le feu Roy en recompense d'une bataille gagnée. Action cōtre le droit commun, qui deſſend d'oſter le bien à vn accusé, auparauant la condeinnation: contre les conſtitutions de Catalogne, qui ne le permettent aux Princes qu'aux ſeuls cas d'heresie où de leze maiesté.

Monsieur de Marca, Viſiteur & Intendant de Juſtice en Catalogne, ſuiuant les ordres de monsieur le Tellier commença à informer, & enuoya incontinent en Cour l'enqueſte qu'il en auoit faiçte: elle fut leuë de Monsieur le Tellier qui la fiſt ſupprimer, voyant qu'elle pouuoit plus ſeruir à canoniser ledit Seigneur mareschal, qu'à luy faire ſon procez. Il iugea par là, que ledit Sieur de marca n'eſtoit pas ſon homme, & qu'il en falloir trouuer quelque autre, qui fuſt à tout faire. Il trouua qu'un appellé Chirat, qu'il cognoiſſoit pour auoir eſté ſon Collegue au Chaſtelet y eſtoit propre, il le choiſit & l'enuoya en Catalogne avec d'amples memoires pour eſplucher entierement la vie de monsieur le mareschal de la mothe.

Et afin que le Sieur Chirat ne manquast pas de ſupport dans vn pays incognu, où on l'enuoyoit: outre les lettres generales que monsieur le Tellier en eſcriuit aux perſonnes publiques au nom du Roy; Il eſcriuit particulierement à monsieur Chabot ennemy de monsieur de la mothe, à Gourry ſon parent Intendant de l'armée, & au Sieur Sain-

de Colombe marin son allié, d'assister ledit Chirat, & sur tout de faire que les soldats & officiers de l'armée tesmoignassent, monsieur le Tellier ne fut pas trompé de ses Messieurs. Ils le servirent tous tres bien. Il y a peu de gens dans l'armée qu'ils n'ayent sollicité à déposer contre monsieur le Mareschal de la Mothe: disant aux vns que c'estoit presentemēt vn homme perdu, que l'affaire regardoit monsieur le Cardinal, & monsieur le Tellier qui les en recognoistroient: aux autres ils offroient argent & promettoient emplois, & ledit Gourry disoit hautement à tous les officiers de l'armée que s'ils ne deposoient, ils ne toucheroient point d'argent.

Ces Messieurs assistez de l'experience, que Chirat auoit acquise au Chastelet avec Monsieur le Tellier: continuerent la sollicitation qu'ils auoient commencée enuers les gens de guerre & Catalans. Carlier commis de monsieur le Page à l'extraordinaire & frere d'un Commis, dudit Sieur le Tellier, fournissoit prodigalement l'argent à tous ceux qui se laissoient corrompre; & enfla sur ce pretexte tellement ses parties que ledit sieur le Page, son maistre ne les voulant admettre, il s'en alla à Rome: où monsieur l'Abbé de la Rochepozay, l'ayant fait arrester prisonnier, les Partisans de Monsieur le Cardinal craignant que cet incident ne descouurist telles subornations de tesmoins, faicts contre Monsieur le Mareschal, le firent mettre en liberté par l'autorité de Monsieur le Cardinal d'Est, qui crut en cela obliger le Cardinal Mazarin. Ce trafic de tesmoignages se faisoit si publiquement en l'armée, & en toute la Catalogne, que lors qu'on eust procedé selon le stile du Parlement de Grenoble, à l'Enqueste Iustificatiue; on en eust peu à informer comme par tourbe.

Mais sans que les Parents & amis de monsieur le Mareschal de la Mothe se soient empressez de cette enqueste iustificatiue, Dieu l'a faicte par vne occasion impreueüe. Chirat selon les constitutions de Catalogne, auoit pris pour assistant vn Catalan qualifié Docteur Francisch Mar-

ry de Villadamor menor Aduocat Fiscal de la Ballia general; hōme de mesme farine que luy, lequel a depuis esté banny de Catalogne & priué de sa charge. Il estoit principal artisan de la coniuration du Bailly de mataro, confident de la Barone d'Alby, de l'Abbé de Gallicans, & autres malafestis; lesquels auoient entrepris de faire reuolter la Catalogne, en tuant monsieur le Comte d'Harcour. Ils furent presque tous executés & monsieur le Tellier sauua lors du naufrage ce Docteur, pource qu'il le iugoit necessaire à instruire le proces de Monsieur le mareschal. Ledit Docteur demeura neantmoins tellement suspect & pour de mauuaises actions qu'il fit depuis, qu'à la poursuite du Procureur fiscal de la Cour du Regent de la Vicairie, le procez luy fust faict & fut condamné. Monsieur le Cardinal & le Tellier afin de le recōpenser du plaisir qu'il leur auoit fait en persecutant monsieur de la mothe l'ont retiré à Paris, & créé Conseiller d'Etat, & fait donner la subsistance par le Roy.

Par les informations sur lesquelles ledit Docteur a esté condamné, il ce voit qu'il a faict deposer cōtre monsieur le Mareschal vn appellé Boffil en luy promettant 50. liures Catelās de pēsion sur le secrets de Tortose: qu'il a tenté d'en faire autant à vn nommé Pocuelo Prestre du diocese de Leyde, luy promettant, (disoit il) par ordre du Vice-roy trois cent liures de pension sur les biens confisquez; qu'il offrit vingt doublons à vn appellé André Villar, avec promesse d'vn benefice s'il vouloit deposer: Puiolar s'en mesloit mesme du costé de France, ayant dit au R. P. D. Ioseph parent Religieux de la Trinité, qui s'en retournoit en Catalogne; que s'il vouloit deposer contre monsieur le mareschal de la Mothe, il luy feroit donner cinq cens liures de pension. Il se rencontre en ces informations vne particularité estrange laquelle fait paroistre les moyens desquels se sont seruis le Cardinal & le Tellier pour animer la bonté de la Royne Regente, contre monsieur le mareschal; que Jacques Alies habitant de Leyde depose, que Chirat & le Docteur marty l'ont sollicité plusieurs fois avec promesse de

Escus de pension sur les biens confisquez; moyennant qu'il deposast, auoir entendu ledit Seigneur mareschal mal parler de sa maiesté; adioustât que pour luy persuader ils luy auoiēt leu la deposition d'un appellé Gerard qu'il leur maintint estre fausse.

Cen'est pas seulement le Docteur marty qui s'est sauué pour auoir agy contre monsieur le mareschal: Augustin Guieno dit & assure qu'on a donné la grace à plusieurs criminels mesme de leze-maiesté au second chef, pour les obliger à déposer: & chose remarquable la plus grand part des mal condamnés estoient ses ennemis; & amis de ceux qui ne l'aymoient pas. Entre les papiers de l'Abbé de Gallicans chef de la coniuration, se trouua vn memoire contre ledit seigneur mareschal apostillé de la main du Docteur marty: entre les papiers d'Onophre Achil se trouua vne promesse de deux mil pistoles au sieur Chabot son ennemy déclaré; La Baronne d'Albi, André Ferré & le Bailly de mataro auoient continuellement monopolé contre luy pendant qu'il a esté Vice-roy.

Outre les recompenses & les promesses, Chirat & le Docteur marty ont contraint plusieurs à déposer contre monsieur le mareschal de la Mothe par l'apprehension de la prison & par la crainte des peines. Ils firent mettre les prisonniers qu'ils iugeoiēt necessaires à leur dessein; dans les prisons de l'inquisition, qui est la plus austere de toutes celles de Barcelone. Ils cōmenceoiēt par leur dire que ce n'estoit pas à eux qu'on en vouloit; mais au mareschal de la Mothe seul & qu'incōtinēt qu'ils auroiēt deposé cōtre luy on les mettroit en liberté, s'ils ne le faisoient, Chirat les menaçoit, en disant auoir l'autorité du Roy de les faire pēdre & rotier: afin de les presser dauātage il les faisoit mettre dās des cachots plus obscurs les fers au pieds, & au col: & se porta vn iour à l'exces de battre le Carcelier pour ce qu'il les traittoit trop doucement. On voyoit dans les informations que Chirat & le Docteur menacerent si hautement de faire donner la Gehenne à vn soldat François appellé Dimas, qui ne vouloit tes-

moigner, que ce pauvre homme fit acheter pour deux pistoles de remèdes; afin de pouuoir se rendre insensible aux rigueurs de la Torture.

Chirat retourne en France, apres auoir agy de la sorte; pendant neuf mois en Catalogne; ou depuis monsieur Fouquet Maistre des Requestes fut renuoyé, afin d'acheuer ce que ledit Chirat y auoit commencé. Mais apres que toutes les Informations dressées par l'un & l'autre eurent esté veuës avec celles qui auoient esté faictes à Lyon par monsieur de Ris, & à Paris par monsieur le Lieutenant Criminel, on fit lors veritablement voir à Monsieur le Cardinal qu'il ny auoit pas lieu de poursuiure dauantage monsieur le Mareschal de la Mothe.

Verité recognuë, qui sembloit auoir quelque peu adoucy le Cardinal: en ce que rencontrant monsieur d'Houdancour, Gouverneur de Corbie, il luy dit, comme s'il eust voulu s'excuser des choses passées, qu'il n'auoit aucunement participé à la detention de monsieur le Mareschal son frere. Que veritablement il l'auoit sceuë, & ne l'auoit pas empeschée, attendu que ledit Sieur Mareschal luy auoit refusé son amitié: que neantmoins celuy qui en estoit cause estant mort il s'emploiroit volontiers pour obtenir sa liberté de la bonté de la Reyne. En suite il permit à mondit Sieur d'Houdancour d'escrire la bonne volonté de S. E. à mondit sieur le Mareschal son frere, auquel à ce subiect il permit auoir encre & papier, afin de faire réponse & de l'en remercier. Le Mareschal escriuit, mais sa lettre n'ayant pas esté trouuée assez explicatiue, Monsieur le Mareschal de Villeroy le dit à Monsieur d'Houdancour; auquel il en bailla vne autre toute faite, laquelle fut enuoyée à Pierre-Encise, & transcrite mot à mot par monsieur le Mareschal, puis renuoyée; & le Cardinal en fut content.

Mais comme il est le plus double de tous les hommes, Il se persuada que puis que monsieur le Mareschal de la Mothe le discoulpoit luy mesme par cette lettre, de tant de mauuais traitemens qu'il luy auoit faict faire: il ne pouoit

plus l'accuser des procédures qui seroient continuées contre luy : il commença aussi à changer de parole : disant à ceux qui luy parloient de l'affaire de monsieur le mareschal de la Mothe, qu'il estoit son amy & qu'il le vouloit servir en temps & lieu. mais qu'il y alloit de l'honneur de la Reyne Regente de faire auparavant cognoistre aux peuples; que sa majesté auoit eu raison d'auoir fait arrester vn homme de sa qualité & de ses services : qu'à cette cause, le Conseil du Roy auoit esté d'avis de r'enuoyer le procès de Mon dit Sieur le Mareschal au Parlement de Grenoble.

Le Cardinal & ses Partisans, ont si souuent repeté ce discours, qu'il y alloit de l'honneur de la Reyne, de faire poursuiure le procès de monsieur le mareschal de la Mothe : qu'on est obligé de leur repliquer, qu'en cela ils estoient tres mauuais Politiques : & que les procédures qu'ils y ont faictes, ont peut-estre plus terny la douceur du regne de la Regence de cette bonne Princeesse, qu'aucune autre action qu'ils y ayent commise. Ils deuoient considerer, que l'histoire marque avec plus de soing, les cheutes & les malheurs des grands hommes, que toutes les autres affaires de leur temps & que les Roys & bons Princes ne les ont iamais poussez iusques à l'extremité, que sur des pretextes specieux de crimes noirs & enormes de lacheté où de perfidie, dont vne punition exemplaire estoit mesme demandee par la voix publique. Et que si au contraire quelques Souuerains ont poursuiuy leurs Illustres subjets, pour des causes foibles comme sont les recherches d'argent; qui est la querelle d'Aleman, qu'on fait ordinairement à ceux qui ont esté dās des emplois cōsiderables: la posterité a blasmé ceux qui les ont poursuiuis, & n'en a pas diminué la gloire des accusez. Le Tacite est plain de telles exemples, & nos Annalles fournissent celles du grand maistre de Montegu, de L'amiral Chabor, des Mareschaux de Gyé, de Biez & de Marillac. Il falloit que la passion du Cardinal fust bien aveuglée, de vouloir acquerir cette haute reputation de douceur, en commandant tant de procédures insolites contre

monſieur le Mareſchal de la Mothe, Viceroy, Illuſtre en toute l'Europe par nombre de batailles, aymé en France pour auoir porté la gloire de la nation iuſques aux Entrailles de l'Eſpagne; & cette perſecution ſeulement fondée ſur le faux pretexte d'un prétendu diuertiffement de quelques ſoixante & dix mil lires, querelle indigne de la colere de la Reyne, & nullement proportionnée aux merites de l'accuſé.

Que ſi les mauuais conſeils des miniſtres portent aucunes fois les Princes, à faire arreſter des perſonnes de conſideration; ſi les raiſons en ſont legeres, il eſt de leur honneur de les mettre en liberté, ſans ouyr autre diſcution: Ainſi les cauſes en eſtant incogneuës les peuples attribuent le tout à la Juſtice & clemence des Princes; Que ſi au contraire les Souuerains veulent publier les motifs qu'ils ont eus, de les arreſter & les mettre en procez: alors ſi les cauſes en ſont petites, apres que les meſmes peuples les ont penetrées, ils y apportent leur iugement & chacun interprete à ſa mode l'action du Prince. Tout conſideré au cas qui ſe preſente, on peut dire avec verité: que la propoſition du Cardinal n'eſt pas ſouſtenable qu'avec des gens qui n'entendent pas quel eſt le veritable honneur.

Neantmoins apres que la commiſſion au Parlement de Grenoble euſt eſté expediée à Amiens, & miſe es mains de monſieur de la Colombiniere Procureur General audit Parlement, mandé expreſ; monſieur le Tellier adiouſta à cette maxime, que l'affaire eſtant venuë à ce point; le dementir n'en pouuoit plus demeurer à ſa majeſté: meſurant par ce beau diſcours l'autorité Royale à l'aulne d'un Procureur du Roy au Châtelet, lequel a ſon honneur veritablement intereſſé lors qu'eſtant pris à partie, Il eſt condamné par le Parlement aux deſpens & dommages Interests d'un accuſé. Il eſt toute autre choſe des perſonnes Royales. Il eſt de leur gloire d'eſtre condamnées lors qu'il s'agit d'une innocence. La plus haute loüange que donne Plin à Traian, eſt la difference qu'il met de la Felicité de
ſon

son règne d'avec celuy des Nerons & Domitianus qu'il auoient immédiatement precedé, en ce que de leur temps le Prince gaignoit tousiours sa cause, & que pendant celuy de ce bon Empereur il estoit presque tousiours condamné.

Ces paroles *le dementir n'en demeurera pas à la Reyne*, prononcez par vn Secretaire d'Estat & vn Procureur general, intimiderent tellement quelques parents de M. le Marechal de la Mothe : que M. d'Houdancour son frere demanda pour luy vne Abolition : M. le Tellier luy respondit qu'il escriuist à M. le Marechal sçauoir s'il l'agrerait, & puis qu'il le laissast faire que tout iroit bien. Mondit sieur le Tellier & M. le Cardinal ne demandoient plus que cela, d'autant que par vne abolition M. le Marechal se fust rendu coupable, & toutes leurs iniques procedures estoient approuuées. Aussi enuoya-il là dessus à M. son frere vne réponse digne d'estre escrite en lettres d'or, qu'estant innocent il s'estoit rendu volontairement prisonnier, qu'il n'estoit pas resolu de se rendre coupable pour sortir, & qu'il n'achepteroit iamais sa liberté par vne lascherie. Madame la Marechale de Villeroy & M. l'Abbé d'Aisne luy conseillerēt souuent; Et Messieurs de la Coste, de la Martiliere, & de la Colombiniere ses Commissaires luy en ont cent foy parlé, allegué des exemples de personnes qualifiées qui n'auoient point esté deshonorées. Il s'est tousiours montré inefbranlable à tels conseils & aduis : Il auoit veritablement raison, de ne laisser point de tache à vne si belle vie que la sienne. Ce reffus de prendre abloition fut cause qu'on le transporta de Pierre-Encise à Grenoble, conduit par les Preuosts & Archers de Dauphiné, Lyonnais, Forests, Beaujolois avec telle rigueur, qu'en plain midy on apportoit de la chandelle en fermant les fenestres de sa chambre.

On ne parle point icy de la procedure sans exemple contre vn Viceroy, ny de la nullité de la Commission

adressée au Parlement de Grenoble, au preiudice de celui de Paris, qui seul peut cognoistre des Ducs & Officiers de la Couronne, pour ce que cela est entierement prouué au premier Factum. On ne parle non plus de ce qu'en tout cas le Parlement de Grenoble en deuoit cognoistre Chambres assemblées, & non la troisieme seulement avec six autres Iuges, comme il estoit porté par certaines lettres Patentes du dernier Decembre mil six cens quarante-sept, ny des violentes iniustes & extraordinaires poursuites du Procureur general, dautant que tout cela est dans le troisieme Factum. Ny aussi de ce qui regarde la iustification de mondit Seigneur le Mareschal, estant parfaictement bien déduite dans le quatrieme. Il suffit de représenter en cettuy-cy ce qui n'est pas dans les precedents.

Messieurs du Parlement de Grenoble, ayant du contentement du Procureur general renuoyé au Conseil du Roy, iuger l'opposition formée à l'exécution desdites Lettres du dernier Decembre, & pour ce deliuré commission afin d'y appeller ledit sieur Procureur general au mois. M. le Tellier auant l'assignation escheuë, enuoya vn Arrest du Conseil d'enhaut, portant cassation de ladite opposition, qu'il disoit contraire à l'usage dudit Parlement; lequel estant mieux instruit de ses coutumes que ledit sieur le Tellier, fit à cette occasion au Roy des remonstrances par escrit, lesquelles furent enuoyées à M. le Chancelier; & donnerent sujet à d'autres lettres Patentes semblables aux premieres, non adressées au Parlement, mais seulement à la premiere Chambre, laquelle ayant esté contrainte de les enregistrer, fit mettre sur le registre que telles Lettres ne pourroient iamais tirer à consequence, qui est la modification ordinaire qu'apportent les Parlements aux violences des temps.

Et ce qui estonna le plus Mesdits sieurs du Parlement fut des Lettres de cachet, que leur enuoya M. le Tellier:

par lesquelles le Roy reconnoissoit, que toutes les choses extraordinaires qu'ils auoient veu faire à M. le Procureur general dans la suite de l'affaire du Marechal de la Mothe, estoient par les ordres expres que sa Majesté luy en auoit donnez. Ainsi que le Roy approuuoit les menaces de Semestres, de veniats, & d'interdictions, mesme que dans cette approbation generale pouuoit estre comprise vne faulseté, dont M. l'Euesque de Rennes leur auoit fait plainte.

Ce n'est pas tout, M. le Cardinal voulant oster à M. le Marechal de la Mothe tous moyens de se deffendre; fit donner Arrest au Conseil d'en-haut signé le Tellier; par lequel il estoit deffendu au sieur de Laborye son Aduocat, & à tout autre d'agir pour luy: avec deffenses à tous Greffiers, de luy deliurer aucuns actes. Cet Arrest quoy que contre le droict des gens, & contre la pieté Chrestienne, qui commande de secourir les affligez & prisonniers, fut signifié audit Aduocat & Greffiers par vn Huissier du Conseil. Marque certaine à la posterité de la iustice qui a esté pratiquée en France pendant le ministere du Cardinal.

De plus M. le Cardinal par lettres de cachet, signées le Tellier: fit faire commandement à M. l'Euesque de Rennes de sortir de Grenoble où il sollicitoit alors le procez de M. son frere: ledit Seigneur se trouuant malade s'en excusa, & l'estriuit à sa Majesté, mais mondit sieur le Cardinal ne pouuant admettre ses excuses, enuoya le sieur de Primaudaye Gentil-homme Huguenot, pour le faire obeïr de gré ou de force, avec ordre de l'accompagner iusques à son Diocese. Digne choix de S. Em. qui apprehendoit qu'un Catholique n'eust peut estre en trop de respects enuers la personne sacrée d'un Euesque. Enfin ce Gentil-homme, quoy que de religion contraire, le trouuant effectiuement malade, ne iugea à propos de le contraindre à se mettre en chemin: Il le manda à la Cour par Courrier expres:

lequel rapporta nouuel ordre à M. le Duc de Lesdiguières, de mettre M. l'Euesque de Rennes hors de Grenoble sain ou malade, ce que mondit sieur le Duc fit exactement executer : Monsieur l'Euesque de Rennes, ayant esté contraint se mettre dans vn brancard iusques à Lyon, où il fut plus de deux mois auant que de pouuoir reprendre sa santé.

Peut-il y auoir au monde vne rigueur semblable, à celle d'empescher vn frere de prendre le soin de deffendre, & de solliciter pour vn frere prisonnier & affligé. Tybere le plus subtil Prince qui fut iamais pour faire condamner les hommes selon les formalitez de Iustice, laissoit cette liberté aux parents des accusez. Et le Roy Henry IV. ayeul du Roy, le plus clement Prince de nostre siecle ; obligeoit mesme les parents à ces deuoirs de pieté, ayant dit aux parents du Marechal de Biron qui prioient sa Majesté de leur permettre. *Que les deuoirs de nature ne se demandoient point à la grace du Prince, que c'estoit chose à laquelle ils estoient obligez, & qu'il seroit bien aise que leurs sollicitations operassent en sorte que le Marechal peust estre absous.* Voila des termes dignes d'un Monarque Chrestien, bien esloignez de ceux que le Cardinal, & le Tellier ont fait prattiquer en cette occurrence au Roy son petit fils.

La troisieme Chambre du Parlement de Grenoble, ainsi establie ; M. le Tellier donna ordre au Procureur general de faire changer la procedure, à ce que les Sieurs Dorée, Talon & Moreau : Interrogez cōme complices à Paris par M. le Lieutenant Criminel à Parpignan par M. Fouguet & Chirat, & par mesdits Sieurs les Commissaires à Pierre-Encise, & à Larsenal, fussent seulement ouys comme tesmoins ; Ledit sieur Procureur general l'executa ponctuellement, encore que ce soit ptocedure non receuë en France : Berault en sa pratique Criminelle l'appelle *iniustice damnable*. Neantmoins sur icelles M. le Procureur general s'hazarde de
présenter

presenter requeste à la troisieme Chambre, à ce que le procez de monsieur de la mothe fut réglé à l'extraordinaire par recollemens & confrontations de tesmoins.

Il se persuadoit faire passer l'affaire à volée de bonnet sans discussion, mais il trouua des Iuges incorruptibles qui vouloient voir les charges sur le Bureau; elles furent entierelement leuës & examinées, & apres la lecture, on remarqua sur le visage de tous Messieurs vn estonnement, de voir qu'on eust entrepris vn homme de la qualité & des seruices de Monsieur de la Mothe sur si peu de preuues,

Il y eut quelques vns de Messieurs, qui sur les seules charges, opinerent à vn hors de Cour & de Proces. La formalité l'emporta; & fut dit, que dans quinzaine Monsieur le mareschal feroit iuger ses appellations: Monsieur le Procureur General fit le possible pour empescher cét Arrest. Il en vint iusques aux anciennes menaces, qui se peuuent voir dans le Verbal que le Parlement a fait dresser de cette affaire. Il fit les mesmes boutades représentées au troisieme *Factum*, pour empescher que la Requeste du sieur Boisor ne fut receüe. Procedures trouuées si mauuaises de tout le monde, que ses meilleurs amis luy conseillant d'y aller plus moderement. Il leur repliqua naïsument, que voulez vous que ie fasse, ie sçais bien que tout cela ne vaut rien; mais i'en ay ordre de Messieurs les Ministres.

En tout le proces, monsieur le Cardinal & monsieur le Tellier, n'ont rien tant apprehende que de voir plaider les appellations de telles procedures dans l'Audience publique d'un Parlement. Aussi pour l'empescher, monsieur le Procureur General entra dans la Chambre, & dit qu'il auoit receu commandement de sa Maiesté, de suspendre l'instruction du procez de monsieur le mareschal, iusques à nouuel ordre. Ce qui n'epescha toute-fois que sur la requeste de monsieur le Cōmandeur de la Mothe, il ne fut ordonné que monf. le mareschal son frere, choisiroit Aduocat & Conseil, pour en execution de l'Arrest venir plaider sesdites appellations, & que le sieur Baudet premier Greffier, se

transporteroit à l' Arsenal, afin de sçauoir la volonté dudit Seigneur mareschal. mōsieur le Procureur General, voyant que ce luy estoit vncoup d' Estat, pour agreer à Monsieur le Cardinal, & à monsieur le Tellier: fit que le Lieutenant de monsieur le Duc de Lesdiguières, empescha formellement deux fois le Greffier de signifier l' Arrest de la Cour à mondit sieur le Mareschal. Et afin que l' autorité du Parlement ne preualust vn matin lors qu' on y songeoit le moins on fut enleuer de Grenoble, moni. le Mareschal comme si c'eust esté vn voleur, par des Archers & Preuosts, qui le remenerent en son ancienne prison de Pierre Encise. Le Parlement voyant les refus faits à son Greffier, & qu'à son insceu, on auoit enleué son prisonnier, en fit informer; & escriuit au Roy sur cet attentat fait à sa Iustice: il n'eut en cela autre satisfaction, sinon que Monsieur le Tellier escriuit que c'estoit par les ordres de sa Maiesté.

Les vacations tost apres suruenües, arresterent le cours des plaintes de ce Parlement, lequel sans auoir esgard ny aux promesses ny aux menaces de la Cour; a tesmoigné dans la longue suite de ceste affaire tant de generosité pour soustenir en iustice vn homme de qualité iniquement entrepris. Que sa probité peut à l' aduenir seruir d'exemple aux Iuges: que les fauoris & ministres des Roys voudront choisir pour executeurs de leurs passions.

Sortant ainsi de Grenoble, Monsieur le Mareschal de la Mothe, ne creut plus r' auoir sa liberté par la voye de la Iustice: se voyant remis sous la tyrannie de Monsieur le Cardinal & du Tellier, il ne l'esperoit plus qu'à la majorité du Roy, ses amis en apprehendoient le pareil traitement qui fut fait à M. Barillon: lors que Dieu prenant pitié de tant de peuples affligez en ce Royaume, donna l'Esprit de resolution à Messieurs du Parlement de Paris, pour interrompre le cours des desordres qui y regnoient.

Ils obtinrent la reuocation des Commissions extraordinaires, avec la seureté publique des personnes. En suite tous les pretendus prisonniers d' Estat furent élargis; &

Monsieur le Marechal eut le bon-heur d'estre du nombre. Il s'en tient tellement obligé à Messieurs du Parlement, qu'en l'occasion presente, il leur est venu offrir cette liberté qui luy auoient moyennée, afin de l'employer avec eux au restablissement de la France.

Alors que par le moyen de Messieurs du Parlement de Paris, les prisons s'ouuroient à tout le monde, Monsieur le Cardinal eut encore l'artifice de vouloir faire croire à Monsieur le Marechal de la Mothe, que sa liberté luy estoit donnée par son moyen; il luy en fit faire compliment à Pierre Encise, par vn sien Gentilhomme, luy promettant de s'y employer, le Marechal l'en remercia aussi par lettres, & tesmoigna luy en auoir obligation. Et c'est volontiers sur le fondement de telles lettres respectueuses escrites en prison, que le Cardinal veut establir sa vanité de pretendu douceur.

On void au present Factum comme cette obligeante vertu a peu paru dans toutes les procedures de M. le Cardinal, lesquelles ont esté si violentes que si les Iuges eussent suiuy les sentimens dits & escrits par M. le Tellier, M. le Marechal ne seroit plus en estat de seruir son pays. Mondit sieur le Tellier tenoit sa ruine si asseurée, que voulant auoir part à ses despoüilles, il demembra le Marquisat de Paillas du Duché de Cardonne pour en gratifier le sieur de Fimarcon Tilladet son allié. Que si Messieurs du Parlement de Paris traittoient à present le Cardinal, le Tellier, & leurs adherans de la sorte, difficilement leur innocence se trouueroit-elle à l'espreuue qu'a esté celle de monsieur le Marechal de la Mothe; Iamais il n'y a eu passion si visible que celle qu'ils ont fait paroistre pour rendre ce Gentilhomme malheureux, iusques à preiudicier au seruice du Roy. Il auoit tousiours heureusement seruy la France, iusques au commencement de leur ministeriat. Et on peut dire qu'il a tousiours si noblement, & si genereusement fait la guerre, & si equitablément gouverné des peuples Estrangers nouuellement soubsmis, que

nonobstant leur iniustes procedures l'Histoire ne laissera pas quelque iour, de former sur luy, l'Idée, & le Modele d'un Viceroy, & Lieutenant General d'un Monarque Conquerant.

FIN.